

հաղորդակից էին դարձնում Եւրոպայի եւ նրա զարգացման մասին իրենց հաւաքած տեղեկութիւններին : Այլ եւ մօտիկութիւնը Եւրոպային եւ հարուստ վիճակը պոլսահայերին դարձնում էին աւելի լուսաւորուած , քան հայկական դաւաններում ապրող զանգուածը :

Մխիթարը Պոլիս ընկաւ 1700 թ . եւ բնակութիւն հաստատեց Գրիգոր Լուսաւորիչ եկեղեցում , ուր կատարում էր քարոզչի պաշտօն : Այստեղ է դնում նա իր միաբանութեան հիմքը , 1701 թ . Սեպտ . 1-ին : Բայց հիմնադրութիւնից զբերթէ անմիջապէս յետոյ , իբրեւ հետեւանք Եփրեմ Ղափանցի եւ Աւետիք Եւզովիացի պատրիարքների օրով կաթողիկոսացած կամ կաթողիկութեան համակրող հայերի , ինչպէս անուանում է Եփրեմ պատրիարքը , «Ֆոանկացեալ քահանաների» ղէմ սկսուած հալածանքներին Մըխիթարը ստիպուած եղաւ արձակել իր աշակերտներին եւ ապաստան որոնել Կապուչինների վանքում , Քրանսական դեսպանատանը կից : Եւ այստեղ գալիս է այն համոզման , որ իր հիմնած վանական միաբանութիւնը անկարելի է պահել Թուրքիայում եւ անհրաժեշտ է փոխադրել որեւէ եւրոպական երկիր , Թուրքիայի սահմաններին մօտիկ մի տեղ : Նա ընտրեց վենետիկեան հանրապետութեան պատկանող Մորէա կղզին , ուր եւ տեղափոխուեց ծպտուած վաճառականի հազուստով : Նրան հետեւեցին եւ իր աշակերտներն ու հետեւորդները*) : 1706 թ . Մխիթարն արդէն տէր է վանքի եւ եկեղեցու Մեդոնա քաղաքում , Մորէա կղզու վրայ : Եւ Կղեմէս ԺԱ . Պապի առաջարկութեամբ ընդունում է վանքի համար սուրբ Բենեդիկտի կարգը :

Մխիթարն ու իր համայնքը Մորէայում երկար չմնացին . 1715 թ . Թուրքիայի եւ Վենետիկի միջեւ ծագեց պատերազմ , եւ Մխիթարը ստիպուած եղաւ թողնել վանքն ու ապաստան փնտոել Վենետիկում , ուր , 1717 թ . Սեպտ . 8-ին , Հանրապետութեան Խորհրդից ստանում է սկզբում սոսկ իբրեւ բնակավայր ,

*) 1701 թ . , վանքի հիմնադրութեան ժամանակ , միաբանութիւնը բաղկացած էր , Մըխիթարից զատ , չորս վարդապետներից եւ չորս աշակերտ-կոթարարներից :

ապա ի սեփականութիւն Սուրբ Ղազարի կղզին , որ առաջ բորոտները կայան էր : Այստեղ հիմնւում է վանքը , որ դոյութիւն ունի մինչեւ այսօր :

Հետզհետէ Մխիթարի մօտ հաւաքուում են նորերը : Կառուցուում են մի շարք վանական շէնքեր , տպարան է հիմնւում , նախապէս քաղաքում , եւ սկիզբ են առնում մի շարք կրթական-մշակութային հիմնարկութիւններ , որոնք հնարաւորութիւն տուին Մխիթարեան միաբանութեան դրաւել ու դարերով պահպանել առաջնակարգ մի տեղ հայերի ազգային-կրթական կեանքում : Մխիթարը միաբանութեան զլուխ մնաց մինչեւ իր մահը , 1749 թ . Ապր . 27-ին :

Մխիթարի յարաբերութիւնները կաթողիկ եկեղեցու հետ , հէնց գործունէութեան առաջին քայլերից Թուրքիայի սահմաններից դուրս , այնքան էլ փայլուն չէին : Հռովմը դժկամակութեամբ էր դիտում Մխիթարի եւ իր հետեւորդների քարոզչական գործունէութիւնը (միաբանութեան չորս անգամները զբերթէ միշտ միսիոնարական շրջապատութեան մէջ էին Թուրքահայաստանի զանազան շրջաններում) : Վերջնականապէս Վենետիկում հաստատուելուց անմիջապէս յետոյ , Մխիթարը դատի կանչուեց Հաւատի Քարողչութեան Ժողովի կողմից՝ ամբաստանուելով , որ ուղարկում է անպատրաստ , քիչ զարգացած եւ կաթողիկ կրօնի մասին անծիշող տեղեկութիւններ տարածող միսիոնարներ :

Մեղադրանքը խիստ ծանր էր , եւ հետեւանքը կարող էր լինել ոչ միայն միաբանութեան միսիոնարական գործունէութեան արգելումը , այլ եւ վանքի փակումը : Վանքը կաթողիկ երկրում էր գտնւում , Հռովմը մօտիկ էր եւ վտանգաւոր էր նրա հետ կատակ անել : Մխիթարը շատ լուրջ վերաբերուեց այդ դատավարութեան , ամէն կերպ պատրաստուեց պաշտպանութեան , ձեռք բերեց ազդեցիկ մարդկանց անունով յանձնարարական նամակներ : Բայց այդ ամէնը հազիւ թէ բաւական էր , եւ դատին յաջող վախճանը թուում էր խիստ կասկածելի :

Սակայն , այն համակրանքը , որ Մխիթարը ձեռք էր բերել Վենետիկը կառավարող Տասնի